

PŌ! PŌ!

HE ORIORI NĀ ENOKA TE PAKARU.

Pō! Pō!

E tangi ana tama ki te kai māna

Waiho me tiki ake ki te Pou-a-hao-kai

Hei ā mai te pakake ki uta rā

Hei waiū mō tama

Kia hōmai e tō tipuna e Uenuku Whakarongo

Ko te kūmara nō Pari-nui-te-rā

Ka hiki mata te tapuwae o Tangaroa

Ka whai mata te tapuwae o Tangaroa

Tangaroa! Ka haruru!

Ka noho Uru, ka noho i a Ngangana;

Putā mai ki waho rā ko Te Aotū,

Ko Te Aohore, ko Hinetūahoanga

Ko Tangaroa! Ko te Whatu-ō-Poutini ē!

Kei te kukunetanga mai


I Hawaiki ko te āhua ia


Ko Māui-wharekino ka noho i a Pani

Ka kawea ki te wai o Monariki

Mā Onehunga, mā Onerere

Mā te pīere, mā te matata






Te pia tangi wharau, ka hoake
Ki runga rā, te Pīpīwharauoa
Nā Whena koe, e 'Waho ē!
Tuatahi, e 'Waho ē!



Tuarua, ka topea i reirā
Ko te whatanui, ko te whatarua, ko te tīhaere
Nā Kohuru, nā Paeaki
Nā Turiwhatu, nā Rakaiora
Ko Waiho anake te tangata i rere noa
I te ahi rara a Rongomaraeroa
Ko te kākahu nō Tū, ko Te Rangikaupapa
Ko te tātua i riro mai
I a Kanoa, i a Matuatonga

Tēnei te manawa ka puritia
Tēnei te manawa ka tāwhia
Kia haramai tōna hokowhitu i te ara
Ka kīia Ruatapu e Uenuku ki te tama meamea
Ka tahuri i te Huripureiata
Ka whakakau tama i a ia
Whakarere iho ana te kakau o te hoe



Ko Manini-tua, ko Manini-aro
Ka tangi te kura, ka tangi wiwini!
Ka tangi te kura, ka tangi wawana!

Ko Hākirirangi ka ū kei uta
Te kōwhai ka ngāora ka ringitia te kete
Ko Manawaru, ko Arai-te-uru
Ka kitea e te tini, e te mano
Ko Makauri anake i mahue atu
I waho i Toka-ahuru
Ko te peka i rere mai ki uta rā
Hei kura mō Mahaki

Ko Mangamoteo, ko Uetanguru
Ko te kōiwi ko Rongorapua
Waiho me tiki ake
Ki te kūmara i a Rangi
Ko Pekehawani ka noho i a Rehua
Ko Ruhiterangi ka tau kei raro
Te ngāhuru tikotikoiere
Ko Poutū-te-Rangi te mātahi o te tau
Te putunga o te hinu, ē tama!

